

2 San Juan

San Juanne An Kwizta Pinkih Para

San Juan, ilapa muntitmikane, an pinkihkas Jesucristora piantuza, wanmakturuza, panamtu. Usne suntuza kurunnamtu, Dios watcha kaizta aizpa kianapa, Diosta piantuza pashinanapa (1-6). Uskas kamtanamtu, kwail kamtamtu aizpa miamanpa, sappamanpa (7-11). Minpa Dios narittuza kakishapu kiznamtu (12-13).

Kakishapu kiztu

¹ Nane ilapa inintamika ish. An pinkih wanmakmuruza, Dios narittuza panamtus. Paiña painkultuzakas pashuruzakas panamtus. Wan uruza watcha pashinamtu. Na uruza pashinamtu-kas, wan Dios watcha pit piankamturuzkas uruza pashinamtu. ² Aune kawarain panashit kit Dios watcha pitmin piampampus-pas. Sun Dios watcha pit aukasa tuanazi, pailta payukima. ³ Au Taitta Dioskas au Jesucristo, Taittawa Painkulkas, uruza wat ki-wainanazi. U akwa wat minñanazi, naizamanpa. Uruza kalpain uzninnanazi. Suasmesa une sun watsal pit miat kit nijkulturuza pashinanazi.

⁴ Nane kwisha wat ish, minpazha paiña pashparuz wanmalarit akwa. Uspane watcha miat kit wat uzamizta. Uspane Taitta Dios ininta aizpa kiamizta. ⁵ Mane, ap izmuruz, mirain. Nane uruza pai-kwanamtu, wan kawarain mamaztuza pashinanapa. Sun inim na pamtu aizpa masas chi. U sun inim an ñancha mijmazi. ⁶ Pashim-turuzne Taitta Dios ininta aizpa miat kit nil uzarawa. Sun an ñancha inim miazi, Taitta Dios ininta aizpa kianapa.

Ñanta kinninmuruz

⁷ Sunkana kwisha akkwan ñanta kininmuruzne au sukin chaat kit Jesucristo awakanain kawirit kizamtuchi. Sunkana

kimmikane ñanta kininmika i. Usne Cristora aliz. **8** Uruzpain iz-tain, u kal kiamtu aizpa kamanpa, Dios uruza mīlamtu aizpa wan sappanapa.

9 Minpazha Cristo kamtara aizpa kwairane, Cristo kamtara aizpa mirakine, usne Dioskasa chatchi. Pailta payu Cristo kamtara aizpa mīmtumikane Taitta Dioskasakas paiña painkulkasakas chamtu. **10** Minpazha uruza izna akane, Cristo kamtara aizpa kamtamtukine, une suntuza “ap yalta napti” kizman. “Kakishapu” kizman. **11** Minminkas “Wat i” kizmumikane uskasa sun kwail kal kimizpailnazi.

Minpa pit

12 Akkwan pit uruza kainashimtukas, mane nane pinkihta pamtuchish. Nane uruza izna ishimentus, u iztakin kwinta kin, u kwisha watsal puranpa.

13 Ukasa wanmaktuzkas narittuzkas uruza “kakishapu” kiznamtu.

Pailti.